

Javni poziv za učešće u programu podrške samozapošljavanju

Općina Novo Sarajevo sa projektnim partnerima, Općinom Ilijaš i Krovnom organizacijom mladih Srbije, u okviru projekta „Podrška uspostavljanju i poboljšanju mehanizama za podršku samozapošljavanju kroz saradnju inovativnih lokalnih zajednica i novih preduzeća u prekograničnom području – SYSTEM“, organizira **besplatan program podrške samozapošljavanju** za pojedince nastanjene na području Općine Novo Sarajevo i Općine Ilijaš u Bosni i Hercegovini i Grada Sremska Mitrovica i Grada Loznica u Republici Srbiji.

Pozivaju se zainteresovane osobe da se prijave za učešće u *Programu podrške samozapošljavanju*, a koji je osmišljen na način da kroz edukativno-mentorske aktivnosti omogućiti dalji i brži razvoj poslovnih ideja. Učesnicima će biti osigurana podrška u jačanju ličnih preduzetničkih kapaciteta, razvoju modela i poslovnog plana za svoj poduhvat, tehničkoj implementaciji proizvoda i/ili usluga kao i prezentaciji poslovnih planova potencijalnim investitorima. Poslovnim poduhvatima koji dobiju pozitivnu ocjenu bit će ponuđena mentorska podrška u oblasti finansiranja iz EU fondova, razmjena iskustva i prenos najboljih praksi od uspješnih preduzetnika kao i promocija i međunarodno povezivanje.

Prijave se mogu predati **do 09.05.2022. godine**, i to elektronskim putem na e-mail: uprojekatsystem@gmail.com

U slučaju bilo kakvih pitanja vezano za učešće u ovom javnom pozivu, ista se mogu uputiti na naprijed navedeni e-mail.

Detaljnije informacije o načinu i uslovima prijave dostupne su u nastavku teksta.

I. UVODNE INFORMACIJE

Općina Novo Sarajevo sa projektnim partnerima Općinom Ilijaš i Krovnom organizacijom mladih Srbije (KOMS) implementira projekat „Podrška uspostavljanju i poboljšanju mehanizama za podršku samozapošljavanju kroz saradnju inovativnih lokalnih zajednica i novih preduzeća u prekograničnom području – SYSTEM“ (engl. “Support to Establishment and Improvement of Self-employment Support Mechanisms through cooperation between innovative local communities and new businesses in the cross-border region”) uz podršku Evropske unije kroz Program prekogranične saradnje Srbija – Bosna i Hercegovina 2014-2020. Projekat SYSTEM ima za cilj povećanje mogućnosti zapošljavanja kroz zajedničke aktivnosti na razvoju novih mehanizama za podršku samozapošljavanju, primjenu novih metodologija, zajedničkih programa, obrazovanje, prenos znanja i aktivnosti na podizanju svijesti u prekograničnom području BiH i Srbije.

II. PROPOZICIJE

1. Predmet poziva – Prijavom na ovaj poziv, zainteresovani aplikanti prijavljuju se za besplatno učešće u *Programu podrške samozapošljavanju* koji se realizuje u okviru prekogranične saradnje Srbija – Bosna i Hercegovina.

2. Predmet poslovne ideje – za učešće u *Programu podrške samozapošljavanju* moguće je aplicirati sa poslovnom idejom koja kao rezultat podrazumijeva formalno osnivanje privrednog subjekta, bez obzira na formu registracije. Ograničenja u vezi oblasti ili industrija iz koje dolaze poslovne ideje su one koje nalaže zakonodavstvo BiH i Srbije. Dodatno, nisu prihvatljive poslovne ideje koje imaju negativan uticaj na ljudsko zdravlje (npr. proizvodnja, prerada ili puštanje u promet alkoholnih pića ili duhanskih proizvoda, proizvodnja koja ima značajan uticaj na zagađenje ljudske okoline i slično).

3. Podnosioci – Ovaj javni poziv otvoren je za prijave **fizičkim licima** sa prijavljenim mjestom boravka/prebivališta na području Općine Novo Sarajevo, Općine Ilijaš u Bosni i Hercegovini i Grada Loznica i Grada Sremska Mitrovica u Republici Srbiji, koji zadovoljavaju sljedeće **opšte kriterije**:

- Podnosilac prijave ima poslovnu ideju koju želi da pokrene i uspostavi formalni biznis ili ako posjeduje neformalnu (neregistrovanu) djelatnost, želi da je formalizuje/registruje;
- Podnosilac prijave je nezaposlena osoba bez obzira na radno iskustvo, dob i stepen obrazovanja, prijavljena na evidenciju Službe/Biroa za zapošljavanje prije objave javnog poziva;
- Podnosilac prijave posjeduje minimalne tehničke vještine, zanatsko znanje ili druge vještine za upravljanje poslovnom aktivnosti odnosno za obavljanje predmetne djelatnosti.

Dodatni kriteriji (nisu eliminatorni – aplikanti koji ispunjavaju dodatne kriterije, biti će dodatno bodovani u skladu sa evaluacijskom ljestvicom):

- Podnosilac prijave je osoba mlađa od 30 godina starosti na datum objavljivanja javnog poziva;
- Podnosilac prijave je student završne godine studija;
- Podnosilac prijave je žena, bez obzira na radno iskustvo, dob i stepen obrazovanja;
- Podnosilac prijave ima status osobe sa invaliditetom, ili živi u domaćinstvu sa osobom sa invaliditetom;
- Podnosilac prijave je pripadnik nacionalnih manjina;

Ukoliko je ukupan broj potencijalnih korisnika koji ispunjavaju navedene uslove veći od broja korisnika koji mogu biti podržani, prednost će se davati prijavama koja ispunjavaju više kriterija. U slučaju ispunjavanja istog broja kriterija, prednost će imati podnosilac koji je ranije predao prijavu.

4. Postupak prijave – prijave je moguće podnijeti na jednom od službenih jezika BiH i Srbije u periodu 11.04.2022. - 09.05.2022. godine, ispunjavanjem odgovarajućeg Prijavnog formulara za Program podrške samozapošljavanju i dostavljanjem tražene dokumentacije u elektronskoj formi na e-mail: euprojekatsystem@gmail.com. Zainteresovani trebaju dostaviti sljedeću *obaveznu dokumentaciju*:

1. Popunjen prijavni formular
2. CV i motivaciono pismo
3. Potvrdu da je osoba na evidenciji Službe/Biroa za zapošljavanje prije objave javnog poziva
4. Potvrdu o boravištu/prebivalištu ne stariju od 6 mjeseci

U slučaju ispunjavanja dodatnih kriterija dostavlja se dodatna dokumentacija:

1. Dokaz o školovanju (kopija uvjerenja o pohađanju fakulteta za školsku 2021/2022 godinu)
2. Izjava o pripadnosti nacionalnoj manjini
3. Uvjerenje o kategoriji i stepenu invalidnosti od nadležne institucije
4. Uvjerenje centra za socijalni rad

Nakon isteka perioda za prikupljanje aplikacija iz ovog Javnog poziva, vašu prijavu će ocijeniti komisija za administrativnu usklađenost prema evaluacijskim kriterijima a koju čine predstavnici projektnih partnera u okviru Projekta SYSTEM.

Nepotpune i neblagovremene aplikacije neće biti razmatrane od strane komisije i bit će odbačene.

Svi aplikanti koji budu zadovoljavali uslove za učešće i čije aplikacije budu pozitivno ocijenjene u odnosu na druge aplikacije, bit će pozvani na *prezentaciju Programa podrške samozapošljavanju* na kojoj će biti obaviješteni o narednim koracima koje je potrebno poduzeti, a kako bi se izbjegle sve nejasnoće vezane za potencijalne korisnike koji imaju pravo učešća u Programu.

Rezultati ovog javnog poziva bit će objavljeni na oglasnoj ploči i web stranicama projektnih partnera: www.novosarajevo.ba; www.ilijas.ba; www.koms.rs; www.loznica.rs; www.sremskamitrovica.rs.

5. Sadržaj podrške – *Program podrške samozapošljavanju* namijenjen je za ukupno 100 polaznika iz Bosne i Hercegovine i Srbije (sa tendencijom da se ostvari ravnomjerman broj iz svake partnerske općine/grada). Učesnici Programa *podrške samozapošljavanju* kroz sudjelovanje mogu dobiti:

1. Stručnu podršku u jačanju preduzetničkih vještina i razvoju poslovnog modela;
2. Unapređivanje biznisa kroz program i individualno mentorstvo;
3. Specijalističku podršku za korištenje sredstava iz različitih programa finansiranja;
4. Promociju i međunarodno povezivanje.

Polaznici će biti podijeljeni u grupe, a način provedbe programa bit će prilagođen COVID-19 mjerama koje budu na snazi u vrijeme implementacije programa.

III. PROCES PODRŠKE

Stručna podrška će u prvoj fazi biti omogućena za 100 kandidata koji su na bazi vlastitih poslovnih ideja, odabrani za sudjelovanje u *Programu podrške samozapošljavanju*. Podrška podrazumijeva specifičnu metodologiju kroz koju se unapređuju preduzetničke vještine korisnika i detaljno razrađuje poslovna ideja. Obavezni edukacijski program u trajanju 6 dana će obuhvatiti sljedeće teme: *Od ideje do vlastitog biznisa, Pravni i regulacijski aspekti start-up poslovanja, Prodaja i marketinški alati, Tehnologije i inovacijski potencijal start-up kompanije, Organizacija poslovanja, Upravljanje, rukovođenje, moderni menadžment, Modeliranje strategije pristupa tržištu, Interna komunikacija unutar preduzeća, Osnovni elementi pristupa prodaji proizvoda/usluga, Procjena vlastite konkurentnosti, Umijeće pregovaranja i posebnu edukaciju „Kako identifikovati i razviti inovativan proizvod/uslugu“*. Metodologija rada ovog programa bit će predavanja, studije slučaja, grupne vježbe, simulacije, debate i diskusije.



Drugi nivo **stručne podrške** bit će omogućen za 30 kandidata, autora najbolje ocijenjenih poslovnih planova od strane Komisije koja će biti imenovana za ovu svrhu, a na osnovu poslovnih ideja razvijenih tokom edukacije. Komisija će izvršiti izbor najperspektivnijih kandidata/poslovnih ideja za učešće u nastavku programa, prema dva ključna kriterija: (1) potencijal poslovne ideje (profitabilnost, broj i kvalitet radnih mjesta, inovativnost, uticaj na okolinu) i (2) posvećenost kandidata/kandidatkinje njenoj realizaciji. Podrška kombinira program mentorstva u trajanju do 50h po kandidatu i petodnevnu obuku kroz napredni nivo obrađivanja teme ključne za uspjeh u poslovanju „Edukacija za uspješno pisanje projekata i apliciranje na EU fondove“. Kroz mentorski program se adresiraju specifični individualni problemi koje nije moguće adresirati kroz grupni rad, a program (intenzitet i teme) se prilagođava svakom individualnom korisniku. U cilju podrške održivosti i rastu novih biznisa i razmjene iskustava i dobrih praksi, bit će obezbijeđena podrška uključivanju u međunarodne mreže za preduzetnike, jednodnevni trening na temu „Prenos najboljih praksi“ kao i organizovana studijska posjeta Hrvatskoj ili Sloveniji.

Cjelokupan program će se realizirati u periodu od maj 2022. do januar 2023. godine. Program izvode certificirani stručnjaci s višegodišnjim iskustvom u oblasti edukacija i preduzetništva.

U slučaju neispunjavanja preuzetih obaveza od strane pojedinaca, implementatori projekta zadržavaju pravo da u bilo kom trenutku isključe bilo kojeg preduzetnika iz procesa pružanja podrške.